

杜
詩
言
志

杜詩言志卷十五

佚名

課小豎鋤斫舍北果林枝蔓荒穢淨訖移
牀三首

病枕依茅棟荒鋤淨果林背堂資僻遠在野興
清深山雉防求敵江猿應獨吟洩雲高不去隱
几亦無心

南郭子綦隱几時嗒然似喪其偶偶者卽其

身也。故曰：今者吾喪我矣。夫吾何喪，不得自主之謂也。聖人絕四，毋意必固我。然意必固三者皆從有我而生，故至人必先毋我。少陵此詩全是此旨。病枕依茅棟，則不得出戶矣。荒鉏淨果林，則隨地而課鉏也。背堂切舍北，在野言雖在野而興逾深。山雉惟恐復遭世網，江猿且與同聲。此時此心如一片高雲，閒閒無著。正如子綦之隱几無心也。夫無心卽

無我矣。是時少陵胸中一段去國懷鄉之念，感觸於中，而時不我與，故且放下，且課童鉏，著移床休暇，且乞暫時清淨，一得快活也。

眾壑生寒早，長林卷霧齊。青蟲懸就日，朱果落封泥。薄俗防人面，全身學馬蹄。吟詩坐回首，隨意葛巾低。

此第二首，則借果林中景物以自比身世之浮沉。言此秋日眾壑生寒，雖早而我果林當

此鉏斫之後爲晴日所噴其昏霧爲之一清
卽如茲世之禍亂雖多而我暫得憩息於此
畧得清寧無障礙也且我之一絲懸挂於此
何殊此林中之青蟲懸於日中聊以就朝陽
也又我之一身流落不保亦何殊此林中之
朱果自落於泥中而遂遭封閉也况當此薄
俗人情之險萬有不同各如其面而欲全此
身於機巧之際惟有學南華馬蹄之篇不受

燒剔刻維而後庶幾其免也故今者且隨意
移床而葛巾吟坐喪我正所以得我乎

籬弱門何向沙虛岸自摧日斜魚更食客散鳥
還來寒水光難定秋山響易哀天涯稍曛黑倚
杖更徘徊

此第三首承上言我今隨意逃虛於此豈復
有所與往還者哉故籬弱週遭難通門向惟
借爲藩翰而已沙虛岸址常見崩摧惟阻人

行步而已。旣無人往還，則此林中之所共相
留憇者，何物乎？惟見日斜之時，唼啣瀆沫者，
魚更食也。客散之處，啁啾啁躍者，鳥還來也。
魚鳥之外，絕無長物。瀼瀼者，寒水；其蕩瀾之
光，難定；令人目眩神搖。寂寞者，秋山；其淒清
之響，易哀；惟令人砭肌銷骨。如此日復一日，
但見暮景侵人，殆至天涯曠黑，則愁慘益甚。
惟有倚杖徘徊而已。更何所容吾希望耶？三

首寫來總見鉏果移牀之旨。不過安於所遇。無有畔援欣羨也。

秋日夔府咏懷奉寄鄭監審李賓客之芳

一百韻

余詮釋杜詩。惟以發明寓意爲主。以其屬於比興。未可以文辭害也。至於直述其事。意盡言下者。自可勿爲多釋。又此篇亦據事數陳。無甚深意。又兼奉寄鄭李。亦屬贈答之常。可

以不必著解。惟因體係排律而韻至於百。不可不求其篇法之妙。與格律之奇。既不板滯。又不重複。悖累。前後照應。極儷體長篇之變化。是不可不爲闡挖也。茲畧分爲十節。詳論之於後。

絕塞烏蠻北。孤城白帝邊。飄零仍百里。消渴已三年。雄劍鳴開匣。羣書滿繫船。亂離心不展。衰謝日蕭然。筋力妻孥問。菁華歲月遷。登臨多物

色陶治賴詩篇

此第一節總提夔府咏懷之大綱言此絕塞孤城以圖經考之則當烏蠻白帝之間此爲方百里乃我老病飄零之所其筋力不堪以對妻孥歲月已付之流水雖有書劍無所用之惟有憂亂傷離自甘衰謝尙有何懷之可詠亦惟是藉茲景物以聊相陶冶而已下卽承寫物色看他於飄零衰謝中忽插入雄劍

羣書一聯，便寫得悲壯，不落寒儉。惟少陵能之。草堂本作所向皆窮轍，餘生日繫船，便無此光燄矣。

峽束滄江起，巖排石樹圓。拂雲羸楚氣，朝海蹴吳天。煮井爲鹽速，燒畝度地偏。有時驚疊嶂，何處覓平川。鷓鴣雙雙舞，獼猴纍纍懸。碧蘿長似帶，錦石小如錢。

此第二節承上言夔之物色，如峽束巖排拂

雲朝海。煮井燒畚。時驚疊嶂。獼猴鷓鴣。蘿帶
錦錢。種種奇闕。而飄零於其間者。非一日也。
春草何曾歇。寒花亦可憐。獵人吹戍火。野店引
山泉。喚起搔頭急。扶行幾屐穿。

此第三節言飄零之久。由春草寒花。以至於
觀獵引泉。搔頭穿屐。其所陶冶於夔之物色
者如此。下遂推類及於身世之感。

兩京猶薄產。四海絕隨肩。幕府初交辟。郎官幸

備員瓜時猶旅寓萍泛苦質緣藥餌虛狼藉秋
風灑靜便開襟驅瘴癘明目掃雲烟

此第四節推類及身世之事言我兩京雖有
薄產卒爲污萊四海雖有交游斷絕音書雖
蒙嚴公之辟引備員工部之郎官然瓜時莫
代萍跡徒奢藥餌之狼藉堪悲秋風之靜便
銷骨惟自知排解不至使瘴癘得以爲災稍
可藉雲烟以自適也下更推演出遭際禮遇

一段

高宴諸侯禮佳人上客前哀箏傷老大華屋豔

神仙南內開元曲當時弟子傳法歌聲變轉滿

座涕潺湲都督柏中丞筵聞梨園子弟李仙奴歌甲影夔州僻迴

腸杜曲煎即今龍廡水莫帶犬戎羶西京龍廡門苑馬門

也渭水流耿賈扶王室蕭曹拱御筵乘威滅蜂

蠹戮力效鷹鷂舊物森猶在凶徒惡未悛國須

行戰伐人憶止戈鋌奴僕何知禮恩榮錯與權

胡星一彗孛。黔首遂拘攣。哀痛絲綸切。煩苛法令蠲。業成陳始王。兆喜出於旼。宮禁經綸密。台階翊戴全。熊羆載呂望。鴻雁美周宣。側聽中興主。長吟不世賢。

此第五節言禮遇之隆爲諸侯上客處華堂而聽哀箏聞法曲而涕潺湲回腸弔影遂憶及龍水腥羶之變賴有耿賈蕭曹之輩戮力王室之賢同效鷹鷂掃除蜂蠆復還舊物遇

止戈鋌使彗孛全消。拘孿復起，恩綸誕沛。苟
令永蠲王業，中興兆民忭喜。諸將則頡頏，呂
望聖主則彷彿。周宣此一段正老杜痛心疾
首，歛歛欲絕之事故歌咏及之下，遂因諸賢
而遞及於鄭李。

音徽一柱數道里下牢干。

鄭在江陵
李在夷陵

鄭李光時

論文章並我先。陰何尙清省，沈宋歛聯翩。律比
崑崙竹，音知燥濕絃。風流俱善價，慳當久忘筌。

置驛常如此登龍蓋有焉。雖云隔禮數不敢墜
周旋高視收人表。虛心味道玄馬來。皆汗血鶴
唳必青田。羽翼商山起蓬萊。漢閣連管寧紗帽
淨江令錦袍鮮。東郡時題壁南湖日扣舷。遠遊
凌絕境佳句染華箋。

此第六節遂專寄鄭李致其贊美之意。言今
者二公處於一柱下牢之遠其賢足以光時
論非余之所能及。其聲名才調當與陰何沈

宋相比而且妙解音律雅擅風流聲價旣高
著作益富置驛而通問者接踵登龍而請謁
者載途而二公則不以地分而墜周旋高視
以收人望虛心而味道玄此其神駿則汗血
之馬青田之鶴差堪似之如此則商山之皓
漢閣之藜幼安之帽文通之錦皆其儕偶而
題詩東壁扣舷南湖絕境遠遊華箋佳句非
神仙中人耶一段贊嘆二公下入已事

每欲孤飛去，徒爲百慮牽。生涯已寥落，國步乃

迍邐。衾枕成蕪沒，池塘作棄捐。

平生多病

卜築遣懷別離

憂怛怛，伏臘涕漣漣。露菊斑艷鎬，秋蔬影澗漣。
共誰論昔事，幾處有新阡。富貴空迴首，喧爭嬾
著鞭。兵戈塵漠漠，江漢月娟娟。局促看秋燕，蕭
疏聽晚蟬。雕蟲蒙記憶，烹鯉問沉綿。卜羨君平
杖，偷存子敬瓊。囊虛把釵釧，米盡坼花鈿。

此第七節承上言二公之文章風格如彼而

我之仰企於茲者，非不欲奮飛而前而無如。百慮牽纏，不獲由己。因自述其苦況，則生涯既拙，國步方艱。卧病荒蕪，池塘空築。涕淚漣於伏臘，蔬菊遠於新阡。回首壯遊，先鞭懶著。惟有與秋燕寒蟬，共其蕭疏局促而已。今雖蒙惠魚書，關情記憶。而我則日窮一日。君平少杖，子敬無氈。釵釧花鈿，把拆易米。尙何堪爲知己道耶。此段自言窮困，下文進以安貧。

之事

甘子陰涼葉茅齋八九椽陣圖沙北岸市暨瀼
西顛羈絆心常折棲遲病卽痊紫收岷嶺芋白
種陸池蓮色好梨勝頰穰多栗過拳勅廚惟一
味求飽或三鱸兒去看魚笱人來坐馬韉縛柴
門窄窄通竹溜涓涓塹抵公畦稜京師農人指
田遠近多云
幾稜稜
音去聲村依野廟壩缺籬將棘拒倒石賴藤纏
借問頻朝謁何如穩醉眠誰云行不逮自覺坐

能堅。

此第八節承上言雖所處貧困而我有安之
之策則甘林之下結茅齋數椽居陣圖市暨
之間甘心羈絆而病亦覺爲痊可於是收芋
種蓮栽梨樹栗一味固足以飽三鱸或亦可
求使令無人兒子可以供役几筵不備客至
可坐馬韉門只束柴窄窄不容車馬竹能通
溜涓涓不竭泉源如是則畦稜野孺足吾里

居倒失缺籬。何妨補葺。由此醉眠於其中。何暇問朝謁之可請也。是不必謂吾行之不逮。而安坐自覺能堅耳。下則謙已勉人。合而言之。

霧雨銀章澁。馨香粉署妍。紫鸞無近遠。黃雀任翩翹。困學違從眾。明公各勉旃。聲華夾宸極。早晚到星躔。懇諫留匡鼎。諸儒引服虔。不逢輸鯁直。會是正陶甄。宵旰憂虞軫。黎元疾苦駢。雲臺

終日畫青簡爲誰編

此第九節則以已之所望於二公者合敘一段言我豹隱於霧雨之中銀章獨澁而二公則馨香上聞於帝座粉署同妍我則困於所學而違眾獨立而二公則明揚當路而勉立功勳意者公之聲華旣得夾輔宸極或於早晚間亦有光寵下及於野人乎則我之汲引當屬望於二公使忠懇之諫仍留匡鼎而儒

術之效。尙及服虔。我雖不善逢迎。猶得進輸。
鯁直。會際昌時。而正陶甄於廊廟也。况當此。
霄衣吁食之時。黎元疾苦之日。而竭忠報稱。
雲臺之畫。青簡之編。豈異人任耶。此下忽接。
行路難。何有云云。四韻於語氣不屬。疑有錯。
簡。蓋長篇謄寫。譌誤相承者有之。今爲改正。
直接安石名高以下六韻。

安石名高晉昭王客赴燕途中非阮籍查上似

張騫披拂雲寧在淹留景不延風期終破浪水
怪莫飛涎他日辭神女傷春怯杜鵑淡交隨聚
散澤國遶回旋

此仍屬前節未完之語言建功立業雲臺青
簡原屬吾曹況今二公忠於王室推獎人才
有晉安石燕昭王之風則阮籍不應久在窮
途而張騫不當遠遊域外但不知披拂之雲
誼在於何日而淹留之暮景恐不能相待也

苟非然者則風期遠舉終當破浪而行雖與
屈子同從彭咸與水怪爲徒亦所願也則辭
巫峽而泣杜鵑我與二公終成古人之交聚
散無定東遊澤國任我迴旋而已此一段則
危言以動之下文接入逃虛之意入前行路
難何有四韻至末作結

行路難何有招尋興已專由來具飛機暫擬控
鳴弦身許雙峯寺門求七祖禪落帆追宿昔衣

褐向真詮本自依迦葉何曾藉偃佺。壚峯生轉
眄橘井尙高褰東走窮歸鶴南征盡跼鳶晚聞
多妙教卒踐塞前愆顧凱丹青列頭陀琬琰鐫
眾香深黯黯幾地肅芊芊勇猛爲心極清羸任
體孱金篋空刮眼鏡象未離銓。

此第十節則自言欲終於逃虛之事大凡古
今來懷清履潔之士忠而見疑信而見謗不
得任用於世皆必有一段憤發不平之氣無

所附著每至於自戕其生如屈子之自沈賈
傅之歿折皆是而有託而逃者則或沉湎於
麴蘖或放情於山水或希志於養生或淪心
於寂滅故逃禪者比比也公非其人而亦藉
是以自解兼以結此詩之局言我若不獲知
已之汲引則辭巫峽而東遊澤國行路之難
曾何足慮之有而招尋之志則別有所專屬
具飛檝惟恐不連且鳴弦一去不返則我豈

復爲世內人耶。將與二氏爲徒。蓋往年曾有
華蓋君之約。我將追踐其言。衣褐終老。則依
迦葉者。又何必定藉偃佺也。於是鱸峯橘井。
轉盼當前。窮極東南。不復作宗邦故國之想。
則聞妙教而塞前愆。與顧凱之丹青。頭陀之
琬琰。爲眾香息地。是勇猛從心。何慮羸孱在
體也。而可曰金篋徒然刮眼鏡。象卒未離銓
也哉。此老此結。是一篇憤極之辭。而後徑有

衡山水漲之厄豈非亦一日之讖耶此詩百
韻又屬近體而磅礴渾灑古氣流轉他家雖
有長篇不得不推杜陵爲絕調矣昔慧遠招
淵明入社許之飲酒而卒攢眉而去蓋賢者
終不爲隱怪所惑也少陵此作心許雙峯門
求七祖亦不過口頭語以寓絕人逃世之意
而錢註遂誤認以爲真而極力箋釋以爭南
北二宗之統系謂公有金湯護法之深旨噫

謬矣。

舍弟觀赴藍田取妻子到江陵喜寄三首
汝迎妻子到荊州消息真傳解我憂鴻雁影來
連峽內鵲鴿飛急到沙頭嶢關險路今虛遠禹
鑿寒江正穩流朱紱卽當隨彩鷁青春不假報
黃牛。

老杜寄弟詩多至性語集中前後十數首皆
一往情深誦讀之下令人悲酸不必待解人

始得也。此篇因其來而喜寄，遂將他胸中一段慶幸情景寫得淋漓盡致。若不逐字爬搜，便至滑口讀過，失其妙旨矣。此第一首先從聞其來說起，言汝來荊州而竟能迎妻子同來，則是此來爲一合不復再離之象。聞此消息，真足以解我之憂。蓋疇昔所謂海內風塵天涯涕淚者，消釋俱盡也。夫我與汝本爲鴻雁一行，今我在巫峽而汝卽來荊州，是鴻雁

之來專爲連峽內而來也。且我與汝本如鵠
鵠在原。今我在沙頭。而汝亦急飛。而到沙頭。
是鵠鵠之急。專爲到沙頭而急也。於是。由藍
田。嶢關之險。而取道於長江。陸盡而舟險。過
而穩。汝之行旣適。而我之喜何如也。遙意此
時。惟有明妝朱紱。彩鷁乘風。不待青春之至。
而早報黃牛之已達矣。黃牛。江陵山名。夫亂
離之世。聚散無憑。觀之去藍田而就江陵。豈

專爲少陵而來而公則喜其適與已近寫來
若觀之此行實爲鴻雁之重天倫鵲鴿之相
急難且嶢關險道而已過則竟若行所無事
江流穩便而可乘則歸美於神功由是期其
來之速而青春不假黃牛而達總從一個喜
字內推算出來詩律至是細入繭絲而或則
曰妙在可解不可解之中亦異乎吾所聞矣
馬度秦關春雪深北來肌骨苦寒侵他鄉就我

生春色故國移居見客心。剩欲提攜如意舞。喜
多行坐白頭吟。巡檐索共梅花笑。冷蕊疏枝半
不禁。

此第二首則致其一體痼瘵之義。承上言我
之喜聞如此。而汝之來則有不勝其苦者。當
其乘馬度秦關。由北而來。正值雪深之時。寒
侵肌骨。痛已甚矣。而汝以就我之故。既堅於
內。遂不爲其所沮。意氣之盛。若於苦寒之內。

而獨生春色。於是去故國而移居他鄉。以就
我一段兄弟至情。豈尋常旅客之心哉。我當
此骨肉之團聚。惟有提攜如意而舞。庶足以
發抒此樂。而因之行坐閒吟。白頭相慶。尙何
缺望耶。此樂也。誰堪共語。惟有檐外梅花。素
所欣惜者。巡檐索笑。略可相賞。然其冷蕊疏
枝。較之吾兄弟歡然之趣。曾未足以當其半
耳。八句前後相照。一氣渾成。宜玩。

庾信羅含俱有宅，春來秋去作誰家。短牆若在
從殘草，喬木如存可假花。卜築應同蔣詡宅，爲
園須似邵平瓜。比年病酒鬪涓滴，弟勸兄酬何
怨嗟。

此第三首則計及於到後同居之事，言汝將
至江陵，數次書來喚吾相聚，吾於明年正月
中旬定欲去夔下峽，就汝於江陵矣。而江陵
之居則有所宜卜者，如庾信羅含之故宅，皆

是也。但不知春秋代易之後，其宅不知爲何人據以爲家。如訪其故里，短牆猶在，喬木猶存，則從其殘草，假以新花，開蔣翊之徑，種邵平之瓜，雖在江陵，與杜曲無異。開病戒之酒，弟勸兄酬，天倫之樂事備矣。尙何亂離漂泊之嗟怨哉！此詩卽卜築意，直欲追配古人高自位置，而以弟兄飲酒勸酬終之，其樂真有王侯將相所不與易者。皆從一喜字內排趨。

出來咄咄怪事

大曆三年春白帝城放船出瞿塘峽久居

夔府將適江陵漂泊有詩凡四十韻

老向巴人裏今辭楚塞隅入舟翻不樂解纜獨
長吁

此詩亦分數節此第一節二韻四語總提一

篇言所以有詩之由夫老向巴人裏者久居
夔府也今辭楚塞隅者將適江陵也夔府非

可久之地。江陵爲歸路之始。然則入舟宜樂。而今翻不樂。解纜宜喜。而今獨長吁。此時此情。吾願與天下言詩者。細加抽繹。蓋人之情。莫甚於感。因感生境。因境成趣。因趣成著。至於著則有固結而不可解者。是以古修道人。欲屏絕一切根塵。今少陵因亂離而漂泊於夔峽。非所得已。其視夔峽原爲不可一朝居者。而今流連至於三年。其間風物之美。因境

而成趣。如灤西之甘林，東屯之夜月，相與依戀者，匪朝伊夕。一旦棄而違之，遂不能無別離之感。故此等苦處，皆從漂泊得來。夫使不遭亂離，不至漂泊，則此夔峽中景物，何至入少陵之懷抱而中傷之。故知多一聞見根塵，不如少一聞見根塵之不生罣礙也。此一段至情至理，俱從一翻字內做出。然則少陵之長吁，非爲別甘林等物，乃是追怨漂泊之致。

令多此一般業障耳。

窄轉深啼狖。虛隨亂浴鳧。石苔凌几杖。空翠撲
肌膚。疊壁排霜劍。奔泉濺水珠。杳冥藤上下。濃
淡樹榮枯。神女峯娟妙。昭君宅有無。曲留明怨
惜。夢盡失歡娛。擺闔盤渦沸。欹斜激浪輸。風雷
纏地脈。冰雪耀天衢。鹿角名灘真走險。狼頭名灘如
跋胡。惡灘寧變色。高卧負微軀。書史全傾撓。裝
囊半壓濡。生涯臨臬兀。死地脫斯須。不有平川

決焉知眾壑。趨乾坤。羶漲海。雨露洗春燕。鷗鳥
牽絲颺。驪龍濯錦紆。落霞沉綠綺。殘月壞金樞。
泥笋苞初荻。沙茸出小蒲。雁兒爭水馬。燕子逐
檣烏。絕島容烟霧。環洲納曉晡。前聞辯陶牧。轉
眄拂宜都。縣郭南畿好。路入松滋縣津亭北望孤。勞
心依憇息。朗詠劃昭蘇。意遣樂還笑。衰迷賢與
愚。飄蕭將素髮。汨沒聽洪鑪。

此第二節承上言長吁時之所見。真有令人

沁心砭骨者我舟之過窄轉入也。惟聞深啼
之狷其浮虛而往也。如隨亂浴之鳧其兩岸
之石苔直欲凌人几杖其寒山之空翠直來
撲我肌膚其壘壁之巒岼森排霜劍其奔泉
之跳擲四濺水珠其藤蘿之上下相參也。爲
杳爲冥其樹林之榮枯相雜也。或濃或淡峯
名神女盡娟妙之形容宅號昭君難信有無
之眞確但留出塞恐惜之曲難追陽臺夢盡

之歡此亦足以弔古傷今撫時感事矣而尤
有驚魂動魄者忽而棹入盤澗如擺闔之騰
沸舟橫激浪恐欹斜之轉輸濤聲之澎湃如
地脈之隱風雷波光之閃灼如天衢之耀冰
雪灘有名鹿角者真如挺而走險有名狼頭
者真爲載蹇跋胡當此危行惡灘之上授命
者何須變色惟高卧以聽之自反者何負微
軀於是傾側之餘書史盡遭傾撓裝囊半壓

溼濡如此九死一生。臬兀方臨而斯須得脫。豈非邀倖乎。由是乘平川之決。赴眾壑之趨。乾坤之大。直與漲海同其昏霾。雨露之恩。且向春燕而施。其洗滌鷗鳥。既可牽絲。驪龍安其濯錦。爾乃日云暮矣。落霞沉綠。綺之琴。夜將闌矣。殘月壞金樞之駕。春風披拂。荻笋初苞。曉露敷榮。蒲茸小出。春雁將歸。猶爭水馬。南燕獨早。已逐檣鳥。

水馬當是水中小燕如鰕蟪之類。註引海馬誤。

矣。煙霧之中遙看絕島，曉晡數晷已納環洲。方辨陶牧之在前，倏拂宜都之已後。南畿縣郭北望津亭，其舟行之速下流之駛如此。既而漸入坦途，息勞朗咏，意暫適而樂笑忘所歷之賢愚，惟將素髮飄蕭，一聽洪爐之汨沒而已。一節內其三轉，初言舟中所見之清冷，繼言舟行所過之險峻，終言一日夜間早達於平坦，得以憩息而朗咏。下節遂入已懷。

丘壑曾忘返。文章敢自誣。此生遭聖代。誰分哭
窮途。卧疾淹爲客。蒙恩早廁儒。廷爭酬造化。樸
直乞江湖。濫瀕險相迫。滄浪深可逾。浮名尋已
已。懶計卻區區。

此第三節承上言我之去夔適楚固已聽其
漂泊然豈無以自問乎夫邱壑終老豈余素
志文章抱負亦將求所以報君奈此生遭際
非無聖主而所如不合終哭窮途卧疾淹留

雖早廁于儒林。蒙朝廷之恩。養而一鳴。輒擯。空酬造化於太虛。放廢江湖。乞存樸直。歷盡艱險。何殊濫瀕堆前。濁世獨清。不異滄浪之水。浮名自此。知屬無益。而懶計終老。何愧生平耶。此節正言漂泊之苦。下入時事。

喜近天皇寺。先披古畫圖。應經帝子渚。同泣舜蒼梧。朝士兼戎服。君王按湛盧。旄頭初傲擾。鶉首麗泥塗。甲卒身雖貴。書生道固殊。出塵皆野

鶴歷塊匪轅駒伊呂終難降韓彭不易呼五雲
高太甲六月曠搏扶回首黎元病爭權將帥誅
山林託疲薶未必免崎嶇

此第四節承上言我之漂泊固如此而今之
時事則有措施違悖者其輕文治而重武功
太平之象正未有期也余茲適過天皇寺而
觀古畫圖見古聖賢之峩冠博帶其足以垂
世作則者若彼又過蒼梧舜廟而悲古帝王

之不可再見。蓋以今日之兵戈不息，四郊多
壘，朝士尙兼戎服，君王且按湛盧，旄頭俶擾。
天紀皇都，下比泥塗。彼帶甲之卒，徒身皆貴。
重而窮經之髦士，道術殊疏。其放逸者如出
塵之鶴，其奔走者非轅下之駒。以是人才委
頓，終無撥亂反治之人。伊呂旣不可得，韓彭
亦不易呼。徒使五雲高懸于太甲，而六月之
息，何日得搏於扶搖之上耶。則黎元之病莫

甦將帥之權無統。我之漂泊於江湖之上者。其崎嶇正未有艾也。全篇四節皆從漂泊二字生出。其機軸迴環照應。錙銖不爽。至琢句之奇。鍊字之潔。寫景之工。寓情之妙。極長篇排體之能事。非他人之所能造也。

詠懷二首

人生貴是男。丈夫重天機。未達善一身。得志行所爲。嗟余竟臧軻。將老逢艱危。胡雛逼神器。逆

節同所歸。河雒化爲血。公侯草間啼。西京復陷沒。翠華蒙塵飛。萬姓悲赤子。兩宮棄紫微。倏忽向二紀。奸雄多是非。本朝再樹立。未及貞觀時。日給在軍儲。上官督有司。高賢迫形勢。豈暇相扶持。疲薊苟懷策。棲屑無所施。先王實罪已。愁痛正爲茲。歲月不我與。蹉跎病於斯。夜看鄴城氣。回首蛟龍池。齒髮已自料。意深陳苦辭。

老杜寫懷詩不一。而大畧相似。以其所懷者

不出此數事也。數事維何以君國言之則胡
雛之逆節乘輿之播遷廟社之傾敗無以解
其憂憤以已事言之則葵忠之莫獻直言之
見放遭時之亂離無以喻其悲怨以民生言
之則閭閻之凋敝賦稅之煩興上官之督責
無以釋其哀痛故偶一感觸卽爲嗟訟此詩
因將適湖南感其漂泊之益遠而作此前一
首是嘆息國事看他先從人生大義說起言

所貴爲丈夫者以其能體天心行直道而得志與否無非此一點正氣不可磨滅有此正氣然後有此懷抱不然卽是一肚皮腌臢何足以向人言而形諸歌咏耶獨是此中正氣倘遇得志之時行所得爲不復見於語言卽不得志而獨善其身亦可山林終老何有歌咏惟是遭逢輒軻與中懷之所素期者大相違背如胡雛逆節翠華蒙塵赤子堪悲紫微

拋棄一紀之間，奸雄各立是非。是其禍亂之
生，豈臣心之所樂觀？又迨至朝常再樹，而軍
儲督課，賢者迫於形勢，棲屑一無所施。又豈
有心世道者之所忍聞？此正先王罪已之時，
傑士奮興之會，而艷城氣暗，龍池波靡，齒髮
已就衰謝，雖有深意，但陳苦辭，有何益哉？

邦危壞法則，聖遠益愁慕。飄飄桂水遊，悵望蒼
梧暮。潛魚不銜鈎，走鹿無反顧。噉噉幽曠心，拳

拳異平素衣，食相拘闕。朋知限流寓，風濤上春
沙。千里浸江樹，逆行少吉日。時節空復度，井竈
任塵埃。舟航煩數具，牽纏加老病。瑣細隘俗務，
萬古一死生。胡爲足名數，多憂汗桃源。拙計泥
銅柱，未辭炎瘴毒。擺落跋涉懼，虎狼窺中原。焉
得所歷住，葛洪及許靖。避世常此路，賢愚誠等
差。自愛各馳騫，羸瘠且如何。魄奪針灸屢，擁滯
童僕慵。稽留篙師怒，終當挂帆席。天意難告訴。

南爲祝融客，勉強親杖履。結託老人星，羅浮展
衰步。

此後一首則言己身漂泊之事，承上言邦國
之危，旣因法則之壞，而聖王不作，令人遐思
虞舜，而蒼梧之悵望彌深，飄飄桂水，何以爲
心哉。世旣不用我，而我亦與世長辭，譬之潛
魚不復銜釣，走鹿豈復返顧，覺與平素所抱
之葵誠亦稍稍變易矣。况因衣食拘闕，朋知

隔遠風濤千里，逆行無期。井竈塵埃，舟航數
具，加以老病牽纏，俗務瑣隘。雖曰人同一死，
亦何必取足名數，以困頓無極耶？徒使多憂
之狀，遭笑於桃源；拙計之餘，遠滯於銅柱。毒
深炎瘴，擺落維艱；盜勝虎狼，中原占踞。昔賢
避亂，皆在此路；賢愚雖別，馳騫則同。於今羸
瘠日增，針灸莫效；徒爲僮僕之所厭倦，篙師
之所齟齬。終當挂帆歸去，而天意尙未可知。

暫爲南方之客，勉強登眺，展步羅浮，豈吾之
所得已者哉！前一首是繫懷君國，後一首咨
嗟已身，終因遭際，輾軻遂出，處皆無勝概，然
公私總係正道，與彼營營苟苟，患得患失之
鄙夫相去遠矣。

醉歌行贈公安顏少府請顧八題壁

神仙中人不易得，顏氏之子才孤標。天馬長鳴
待駕馭，秋鷹整翮當雲霄。君不見東吳顧文學，

君不見西漢杜陵老詩家筆勢君不嫌詞翰升
堂爲君掃是日霜風凍七澤烏蠻落照銜赤壁
酒酣耳熱忘頭白感君意氣無所惜一爲歌行
歌主客。

呂汲公作杜詩年譜以觀其辭氣之少而銳
壯而肆老而嚴其意似矣而吾謂其遭際之
時亦有不同者蓋方其在天寶以前天下無
事公方以進取爲心一時意氣自盛及其成

都以後居草堂之間多恬淡自得之音逮夔
峽以後流離播遷無復往時豪宕之致故其
爲詩幽憂激楚思深慮遠又加以老年涉
世多哀樂之感此其謹嚴非關學力言之今
觀此詩而見少陵之豪氣猶存特無其境以
發之耳顏少府固妙人而顧八分又屬俊侶
一時快聚命酒揮毫此與當年其鄭廣文李
太白岑參兄弟漢陂樂遊原無異故其音節

飈舉猖狂恣肆，故態猶存。豈遂以老而謹，促
爲能哉。存此以見情隨事遷之旨。其意言下
自見，不須置解。

公安縣懷古

野曠呂蒙營，江深劉備城。寒天催日短，風浪與
雲平。灑落君臣契，飛騰戰伐名。維舟倚前浦，長
嘯一含情。

前四句是古，後四句是懷。呂蒙營、劉備城點

明公安。催日短。言古之易逝也。與雲平。言古
之不留也。古既如此。而有觸動予懷者。則以
古人之勝概。非後世之所能及。如君臣相悅
則灑落於形骸之外。知無不言。言無不聽。與
今人之君聖臣諛。批鱗報罷者。相去霄壤。又
如戰伐功勳。則飛騰於九天之上。勝固可居。
敗亦可守。與今人之乘輿播越。廟社坵墟者。
何啻河漢。蓋此二事。素爲少陵之所悲憤。故

因公安而慨然興感也。結語長嘯含情，足懷
字意。

曉發公安

數月憇
息此縣

北城擊柝復欲罷，東方明星亦不遲。鄰雞野哭
如昨日，物色生熊能幾時。舟楫眇然自此去，江
湖遠適無前期。出門轉盼已陳迹，藥餌扶吾隨
所之。

人生輕塵弱草，白駒過隙，無論流離顛沛，斷

梗浮萍卽使王侯將相際會風雲亦都過而
不留此轉盼已陳迹五字直可令人通身汗
下抗聲長號今先生於此曉發時爲之寫照
言此朝朝景色日復一日便送盡無限生死
晨鐘暮鼓吃飯穿衣自不必說卽是異樣繁
華富貴亦不久留所謂鄰雞野哭如昨日物
色生態能幾時也今憇此縣者數月而一旦
眇然以去前期之無定亦不過昨日之已然

然則安往而非陳迹哉。衰老者雖暫憑藥餌以相扶，其與物色生態又何殊焉。此乃一篇醒世大文，不可作紀行詩讀過。

杜詩言志卷十五終

...

...

杜詩言志卷十六

佚名

登岳陽樓

昔聞洞庭水。今上岳陽樓。吳楚東南坼。乾坤日夜浮。親朋無一字。老病有孤舟。戎馬關山北。憑軒涕泗流。

洞庭爲宇內第一巨浸。岳陽樓爲天下莫大奇觀。今以少陵巨手作此詩。不知當用何等

筆法乃今觀其寫來只用昔聞今上四個虛字使他人所欲極力鋪張而猶恐不及者他卻早已輕輕和盤託出蓋昔聞者乃是聽得人人稱說此湖之大先已驚天動地而今日得上此樓乃知人所傳說確是無差是此四字寫洞庭之大從人口中落到自己眼中真能全體活現接下一聯我足言吳楚跨荆揚二州屬東南半壁其方數千餘里今當此湖

望之直似分坼此湖之半。乾坤本載此湖。而今逼近此湖。但見此湖。不見乾坤。反似乾坤轉浮於此湖之上。如此寫洞庭。空靈浩渺。不可名狀。不比他家。如孟浩然但解作氣蒸波撼爲描頭畫角生活也。然昔聞今上四字。固善寫景。又有深情。蓋昔聞此水時。只在天末。未必今生果能目覩。乃不料亂離漂泊。一程一程。竟流落到此。是今日之上。又迥出於昔。

聞之意外也。以此身世俱遠，不獨親朋不見，並一字俱無，而老病隨身，別無長物，只此孤舟一具，是昔聞此景，今上而見此景，而昔聞之情，則不料有今日之上之情也。是此四字，寫一時情景俱到，末一結，又以戎馬關山於題外樹，此大幟遙遙與此湖作對，真爲起結相稱。夫洞庭固大，而不知關山之北，其爲戎馬戰鬪之場，更有大於此者，兩大之間，而以

舉目無親孤舟老病之一人介乎其中憑軒
涕泗誠爲大痛然獨扛大筆作此大文又真
足爲千古之三大絕也

湘夫人祠

肅肅湘妃廟空牆碧水春蟲書玉珮蘼燕舞翠
帷塵晚泊登汀樹微馨薦渚蘋蒼梧恨不盡染
淚在叢筠

虞帝陟方而二妃從之固夫婦君臣之大義

也。少陵一生忠愛，宜其感觸獨深。言空牆碧水之潰，蟲書燕舞之境，而湘妃之廟，巋然自肅者，以其高義爲千古之所不磨也。今日之晚泊於此，登其堂而藉渚蘋以薦微馨，覺當日蒼梧之恨，淚染叢筠，至今猶沁人胸臆也。

祠南夕望

百丈牽江色，孤舟泛日斜。興來猶杖屨，目斷更雲沙。山鬼迷春竹，湘娥倚暮花。湖南清絕地，萬

古一長嗟。

湖南僻遠爲古來放逐之臣棲託之地如屈原賈誼皆其人也卽湘靈亦然雖非放逐而漂泊則一老杜流寓至此遂引爲同調言山鬼湘娥獨於此擅其清絕而爲濁世之所不容者率皆同其踪跡撫今思昔不能不同爲萬古之長歎也。

上水遣懷

我衰太平時。身病戎馬後。蹭蹬多拙爲。安得不
皓首。驅馳四海內。童稚日餽口。但遇新少年。少
逢舊親友。低頭下邑地。故人知善誘。後生血氣
豪。舉動見老醜。窮迫挫曩懷。常如中風走。一紀
出西蜀。於今向南斗。孤舟亂春華。暮齒依蒲柳。
冥冥九疑葬。聖者骨已朽。蹉跎陶唐人。鞭撻日
月久。中間屈賈輩。讒毀竟自取。鬱沒二悲魂。蕭
條猶在否。齒萃清湘石。逆行雜林藪。篙工密呈

巧氣若酣杯酒。歌謳互激遠。回斡明授受。善知
應觸類。各藉穎脫手。古來經濟才。何事獨罕有。
蒼蒼眾色晚。熊挂元龍吼。黃熊在樹顛。正爲羣
虎守。羸骸將何適。履險顏益厚。庶與達者論。吞
聲混瑕垢。

上水。謂自潭之衡。舊註云然。今仍之。通篇言
蹭蹬窮迫之苦。由蜀而衡。不獨屈賈遭讒。自
取鬱沒。卽虞帝九疑之葬。亦終隨大化。又何

足怨尤耶。獨是少年輕薄，一種抵當不得。與世途荒險異樣，防禦不得。顏厚吞聲，安得達者而與之共論衷曲也。辭意自明，不須細解。

遣遇

磬折辭主人，開帆駕洪濤。春水滿南國，朱崖雲日高。舟子廢寢食，飄風爭所操。我行匪利涉，謝爾從者勞。石間採薇女，鬻菜輸官曹。丈夫死百役，暮返空村號。聞見事略同，刻剝及錐刀。貴人

豈不仁。視女如莠蒿。索錢多門戶。喪亂紛嗷嗷。
奈何黠吏徒。漁奪成逋逃。自喜遂生理。花時甘
縕袍。

遺遇謂篇中所言石間採薇女以下十二句。
其遭官吏刻剝有如莠蒿足可悲憫與集中
潼關石濠諸篇相類而吾獨舉此置解者蓋
以此作之旨。在借此女可傷之事。以形容自
家所處。則又此善於彼。猶爲生理獨遂也。是

以所遇他人之苦，排遣自家所遇之苦，故謂之遭遇。然後知作詩之妙，顧又在於命題耳。

北風

春生南國瘴，氣待北風蘇。向晚霾殘日，初宵鼓大鑪。爽攜卑溼地，聲拔洞庭湖。萬里魚龍伏，三更鳥獸呼。滌除貪破浪，愁絕付摧枯。執熱沉沉在，凌寒往往須。且知寬疾肺，不敢恨危途。再宿煩舟子，衰容問僕夫。今晨非盛怒，便道卽長驅。

隱几看帆席，雲山湧坐隅。

此詩因北風之解炎瘴而思治平之已禍亂也。言春生多瘴，如世亂之紛然而待北風而蘇，亦猶明君察相之不容緩也。若果應運而興，如此北風之向晚而起，其政教之赫然丕變，亦必若此初宵之鼓大鑪，則爽攜卑溼庸濫者化爲清明，聲拔洞庭頑梗者奉其訓誡，魚龍之伏如盜賊之屏跡，鳥獸之呼如閭閻

之忭喜滌除不率者。破浪前驅。愁絕求寧者。摧枯長往。向之執熱沉沉者。今則凌寒須次矣。我於此時所抱之疾。肺頓爲寬解。寧復有危途之堪恨耶。則雖再宿於此。煩舟子之維舟而待。亦所甚樂。而衰容頓加悅澤。問之僕夫。豈曰不然耶。然則北風之妙如此。況復爲吾南征之便利。不可卽此而長驅不返耶。隱几而看雲山。其湧出於坐隅者。其相況寧有

涯也。一篇幻景文字，真如夢如幻，可怪之極。

入衡州

兵革自久遠，興衰看帝王。漢儀甚照曜，胡馬何
猖狂。老將一失律，清邊生戰場。君臣忍瑕垢，河
岳空金湯。重鎮如割據，輕權絕紀綱。軍州體不
一，寬猛性所將。嗟彼苦節士，素於圓鑿方。寡妻
從爲郡，兀者安堵牆。凋敝惜邦本，哀矜存事常。
旌麾非其任，府庫實過防。恕已獨在此，多憂增

內傷偏裨限酒肉。卒伍單衣裳。元惡迷是似。聚
謀洩康莊。竟流帳下血。大降湖南殃。烈火發中
夜。高煙焦上蒼。至今分粟帛。殺氣吹沅湘。福善
理顛倒。明徵天莽茫。銷魂避飛鏑。累足穿豺狼。
隱忍枳棘刺。遷延胝趺瘡。遠歸兒侍側。猶乳女
在旁。久客幸脫免。暮年慙激昂。蕭條向水陸。汨
沒隨漁商。報主身已老。入朝病見妨。悠悠委薄
俗。鬱鬱迴剛腸。參錯走洲渚。春容轉林篁。片帆

左柳岸通郭前。衡陽華表雲鳥埤。名園花草香。
旗亭壯邑屋。烽櫓蟠城隍。中有古刺史。盛才冠
巖廊。扶顛待柱石。獨坐飛風霜。昨者聞瓊樹。高
談隨羽觴。無論再繾綣。已是安蒼黃。劇孟七國
畏。馬卿四賦良。門闌蘇生在。蘇生侍御勇銳白起
強。問罪富形勢。凱歌懸否臧。氛埃期必掃。蚊蚋
焉能當。橘井舊地宅。仙山引舟航。此行厭暑雨。
厥土聞清涼。諸舅剖符近。開緘書札光。頻繁命

屢及磊落字百行。江總外家養謝安。乘興長下
流。匪珠玉。擇木羞鸞鳳。我師嵇叔夜。世賢張子
房。柴荆寄樂土。鵬路觀翱翔。

此自敘入衡之故。時公居潭州。刺史崔瓘爲
臧玠所殺。因避其亂而入衡。首一段十二句。
言兵革之興。由於安史之亂。潼關失守。京邑
蒙塵。以致重鎮不奉朝命。輕權又無控制。軍
州之召亂。皆由於寬猛之失宜。其由來久矣。

嗟彼苦節士以下十二句言崔瓘但知苦節而昧圓方惜凋敝而重邦本任府庫而增憂傷以致偏裨卒伍皆生缺望而元惡得以因之爲亂矣元惡迷是似以下十句言臧玠不顧理之是非而聚謀倡亂以致血流帳下火發中夜煙焦上蒼福善禍淫之理旣以無徵而天道之茫茫不可復問矣銷魂避飛鏑以下八句言已於此時避之惟恐不及穿豺狼

而隱荆棘幸而脫免苟全性命豈復有激昂
之志哉蕭條向水陸以下十句言自潭登舟
隨水陸之便而南入於衡既以老病不能歸
朝報主惟有走洲渚而轉林篁片帆直下無
復有剛腸之如昨者華表雲鳥埤以下四句
點染衡州之壯麗中有古刺史以下四句贊
美刺史之多才昨者間瓊樹四句言已之叨
列談讌藉繾綣而安蒼黃劇孟七國畏八句

言諸公興問罪之師期於掃蕩凶逆橘井舊
地宅以下至末言此地之可爲樂土又值外
家之適近於此可相藉以爲依也通篇共四
十四韻不出於憂世亂而悲所遭嚴聲罪而
祝軍勝而中間之所拳拳不釋者猶在於報
主身老入朝病妨二事此其所爲忠愛之獨
至歟

望嶽

南嶽配朱鳥，秩禮自百王。歛吸領地靈，瀕洞半
炎方。邦家用祀典，在德非馨香。巡狩何寂寥，有
虞今則亡。泊吾隘世網，行邁越瀟湘。渴日絕壁
出，漾舟清光旁。祝融五峰尊，峰峰次低昂。紫蓋
獨不朝，爭長業相望。恭聞魏夫人，羣仙夾翱翔。
有時五峰氣，散風如飛霜。迢限修途，未暇杖
崇岡。歸來覬命駕，沐浴休玉堂。三歎問府主，曷
以贊我皇。牲璧感衰俗，神其思降祥。

少陵望嶽詩有三，而各不相侔，以其時地之所處有不同也。其於岱也，當壯盛有爲之時，其氣象含蓋一切，故其辭雄以博，其於華也，則方當奸邪讒害之後，去官惟恐不速，故其言憂以深。今之於衡，則當禍亂相尋之餘，而念切君國之重，故其辭悲以約。首言嶽體之尊，祀典之隆，而惜非太平之世，故時巡之舉，缺如以致避世網而行邁過此者，徒挹其清。

光瞻仰其高峰。恭聞其仙跡。肅志於登堂。然皆無益也。亦惟歎問府主。其何以虔具牲璧。敬禮嶽神。求其降祥。以贊我皇乎。夫修德以薦馨香。人君之事也。而弭災寢變。以佑國家。亦大神之所不容辭也。而奈何。人神不格。幽明不通。如此。徒使牽迫修途者。抱無涯之戚耶。

題衡山縣文宣王廟新學堂呈陸宰

旄頭彗紫微，無復俎豆事。金甲相排蕩，青衿一
憔悴。嗚呼已十年，儒服傲於地。征夫不遑息，學
者淪素志。我行洞庭野，歛得文翁肆。侏侏胄子
行，若舞風雩至。周室宜中興，孔門未應棄。是以
資雅才，煥然立新意。衡山雖小邑，首唱恢大義。
因見縣尹心，根源舊宮闕。講堂非曩構，大屋加
塗墍。下可容百人，牆隅亦深邃。何必三千徒，始
壓戎馬氣。林木在庭戶，密榦疊蒼翠。有井朱夏

時。輓轡凍階屐耳。聞讀書聲。殺伐災髣髴。故國
延歸望。衰顏減愁思。南紀改波瀾。西河共風味。
採詩倦跋涉。載筆尙可記。高歌激宇宙。凡百慎
失墜。

崇聖學興教化。原屬太平盛事。一自戎馬陸
梁。殺伐四起。宇宙間求生之不暇。何復問儒
服禮樂哉。老杜乃稷契一輩人。目擊時亂。傷
心久矣。茲遊衡山。獨喜陸宰能於兵戈擾攘

之間倡興文教修廣廟堂故急予之言十年
以來旄頭爲災彗於紫微而俎豆之事墜矣
但見行役之夫奉命征調以從事於金甲之
排蕩寧復有役志於誦讀者哉乃今行此洞
庭之野猶有陸宰其人者首倡大義恢宏闕
宮塗塹大屋可容百人一時之被服雅化者
泯泯然如新自舞雩而至使我故國衰顏愁
思頓減誠不意此南紀炎荒忽覩此西河風

味也。然則採風者雖倦於輶軒而我之載筆以遊者獨不可爲之記贊乎。百爾君子尙其知所效法而無墜失此義耶。

小寒食舟中作

佳辰強飯食猶寒。隱几蕭條戴鶻冠。春水船如天上坐。老年花似霧中看。娟娟戲蝶過閒幔。片片輕鷗下急湍。雲白山青萬餘里。愁看直北是長安。

此詩通首只極寫蕭條二字。蓋佳辰無事，惟有鷓鴣冠隱几，強飯而止。其爲蕭條可知。問其所以蕭條者，則以家鄉君國皆越在萬里雲山之外，絕無行樂之處。其所奉以周旋者，惟此春水坐船，如在天上。老年看花，似在霧中。此二事外，別無所有。彼娟娟戲蝶，雖過閒幔，片片輕鷗，自下急湍於我，初何涉耶。然則隱几鷓鴣冠者，其爲蕭條何如也。此詩二三一聯。

人皆歎其工妙。謂天上坐船描寫春水之泛溢霧中看花描寫老年之昏瞶。二意寫景精鑿不刊。而不知此解猶僅見其膚廓而未嘗於蕭條二字體會神理。蓋天上坐便有不安穩意。霧中看便有趣味意。是寫景精切一層內又含蓄著一層情節。未可草草讀過也。

風雨看舟前落花戲爲新句

江上人家桃樹枝。春寒細雨出疏籬。影遭碧水

潛勾引風如紅花卻倒吹吹花困懶傍舟楫水
光風力俱相怯赤憎輕薄遮入懷珍重分明不
來接濕久飛遲半日高縈沙惹草細於毛蜜蜂
蝴蝶生情性偷眼蜻蛉避伯勞

此詩借風雨中落花以喻薄俗輕出者之動
遭錯迕而難於援手也言此江上桃枝不避
春寒風雨出疏籬而臨碧水與之影相勾引
猶之當世之小有才者不識時艱出而與當

道之人相結納不意結納未成而已遭強暴者之所妒害如紅花之已遭風妒而吹去矣甚矣入世之難也妒害之後孤窮失路舉目無親飄飄羈旅在在可畏如彼吹落之花困頓無力依傍舟楫而水光風力皆成危難怯孰甚焉斯時雖有憐惜之人欲加援手而彼以播蕩之餘勢不由己亦如彼花之赤憎輕薄者苟能遮入人懷亦分明有珍重之意而

無如隨風無定不相承接於是沾溼既久翻
飛益遲亦有幸而半就日高者或縈於沙或
惹於草其細已甚寧復有高枝之可踞哉亦
猶失路之末微無復地分之可據也而世之
老奸巨猾者方且前肆貪求後防攘攫是猶
蜜蜂蝴蝶之類見此飛花方欲進取而又偷
眼蜻蜓畏避伯勞恐其害己其首鼠兩端進
退驚翼之狀尤足令人長太息也一篇南華

文字不謂於少陵新句見之。

清明二首

朝來新火起新煙，湖色春光淨客船。
繡羽銜花他自得，紅顏騎竹我無緣。
胡童結束還難有，楚女腰肢亦可憐。
不見定王城舊處，長懷賈傅井依然。
虛霑焦舉爲寒食，實藉嚴君賣卜錢。
鐘鼎山林各天性，濁醪麤飯任吾年。

此詩是借佳時之景物以寫照自己之老病

窮愁前一首是從清明說到自已言今者時
屆清明家家皆鑽新火便覺有多少生色而
我居此客船之中惟此一片湖色春光而已
看他下一箇淨字便是岑寂到十分地位也
且看眼前大小何一不有自得之樂而我皆
無有卽如飛鳥之繡羽銜花小兒之紅顏騎
竹他皆自得我則無緣又如胡童之結束楚
女之腰肢他皆可憐我還難有其故何也蓋

在他只是本地風光而我則客船都淨也夫
我豈與此繡羽紅顏胡童楚女爭較喧寂者
哉惟是生平抱負原當禮接王侯定策廊廟
而今王城不見賈井空懷借君平賣卜之錢
爲焦舉之寒食一貧至此節日無聊曾繡羽
胡童之不若抑獨何耶然吾遯世絕不以爲
悶也蓋鐘鼎山林雖有不同而各完天性之
本然使自無愧怍則一故自今以往惟濁醪

癯飯聊卒吾年亦安往而不得哉

此身飄泊苦西東右臂偏枯左耳聾寂寂繫舟
雙下淚悠悠伏枕半書空十年蹴踘將雛遠萬
里鞦韆習俗同旅雁上雲歸紫塞家人鑽火用
青楓秦城樓閣煙花裏漢主山河錦繡中風水
春來洞庭闊白蘋愁殺白頭翁

此後一首是從自己說到清明言我之安貧
固無往而不可但無如老病之苦則又有不

堪言述者。總因漂泊東西之後。不勝勞瘁。故
右臂至今偏枯不遂。左耳聾聵失聰。與言及
此。使寂寂繫舟之中。雙淚垂下。悠悠伏枕之
次。強半書空。追憶十年以來。將挈雛稚。遠遊
萬里。其奔走不寧也。有如蹴踘。其懸虛靡定
也。有似鞦韆。此習俗之以節序行樂者。而我
之苦況。乃適當其似。誰爲爲之哉。今也旅雁
上雲。則言歸紫塞矣。家人鑽火。又改用青楓。

矣時既當歸而時有不逮歸當其時而歸則
未能惟見秦城樓閣遠在煙花之裏漢主山
河遙遙錦繡之中乃僻處洞庭與春水同其
遼廓者一望白蘋無際對此茫茫百端交集
白頭翁能無愁絕耶看他二首句句縮定清
明句句對照自己而一順一逆極行文變化
之能事乃又恰是近體長句所謂詩律之細
洵非老杜不辦也

燕子來舟中作

湖南爲客動經春。燕子銜泥兩度新。舊入故園
常識主。如今社日遠看人。可憐處處巢君室。何
異飄飄託此身。暫語船檣還上去。穿花落水益
霑巾。

此借燕子之來以喻己身之飄泊也。故園識
主之燕未必卽社日看人之燕。然今日看人
者燕也。故園識主者亦燕也。燕固隨地而有。

而飄飄遠遊者，何堪與之同其棲託耶。迨至
觀其暫語船檣，穿花帖水，而燕之無賴，益足
令人霑巾抱痛無涯也。

迴棹

宿昔試安命，自私猶畏天。勞生繫一物，爲客費
多年。衡嶽江湖大，蒸池疫癘偏。散才嬰薄俗，有
跡負前賢。巾拂那關眼，瓶罍易滿船。火雲滋垢
膩，凍雨裊沉緜。強飯尊添滑，端居茗續煎。清思

漢水上涼憶峴山顛順浪翻堪倚迴帆又省牽
吾家碑不昧王氏井依然几杖將衰齒茅茨寄
短椽灌園曾取適遊寺可終焉遂性同漁父成
名異魯連篙師煩爾送朱夏及寒泉

衡陽舟居苦熱思歸漢峴以就清涼乃作迴
棹之詩衡嶽江湖大以下十二韻皆質言其
事惟起四句則推原所以至衡之由而少陵
一生學問本領具見於此蓋安命者士君子

處世之大防。富貴貧賤。憂虞患難。皆一聽於所遇。絕無怨尤。惟安命故也。然安命又須畏天。惟畏天然後能盡道。盡道然後能得其正命。不然死於桎梏。亦得謂之安命耶。商辛之言曰。我生不有命在天。此非安命者也。首句暢發此旨。言我一生安命。而安命之中。私心猶獨畏天。是以所行所止。皆一本於天理。不敢妄爲非分。夫旣本天而行。復何爲奔走飄

泊至於如此其遠則以有身之爲累不能不
勞生以自活是此生之勞皆由於此身之一
物蓋人生於天地亦一物耳而勞吾生以養
之是卽爲勞吾生之一物解者謂爲爲名爲
利夫少陵豈爲名利所繫者哉故知不善說
詩者豈惟將詩說壞並將古人說壞可不爲
大痛耶爲客費多年費字大妙謂吾生有涯
大半皆爲一物之所繫費去故知遠客多年

誠非得已而衡蒸疫癘徒滯散才豈敢同於
古來放逐之臣如屈賈諸君之足賢耶其跡
雖同而所負良多矣此以上表明至衡之故
下言此身旣足爲累則一切資身之具皆非
吾志之所存旣不足重適足取厭如巾拂之
類何堪挂眼瓶罍之屬動卽滿船況當此炎
夏之時火雲重滋垢膩偶或凍雨又欲攬挹
沈緜客途之困頓如此雖或強飯自寬有尊

羹添其甘滑。端居自適。有茗飲續其濃。煎然而清。思漢水之湄。涼憶峴山之首。何可猝得耶。今者苟得。翻然命棹而迴。則順浪可遵。牽挽可省。至峴則吾家之碑。故在。過漢則王粲之井。依然。此時操几杖而遊。旣可扶將衰齒。編茅茨而處。亦何慮夫。短椽或灌園而取適。或遊寺以終老。惟求其遂性而止。初無意於成名。是以避炎蒸而取清涼之一道乎。彼篙

師者尙其操舟送我使當此朱夏中而獲觀
夫寒泉之及耶通篇因畏炎蒸而思清涼遂
說出客途中身外之物一切皆成贅累何有
於成名此自少陵曠達襟懷至於入首安命
畏天二語則是古聖賢立身行道本領公豈
僅一詩人而已耶

岳麓山道林二寺行

玉泉之南麓山殊道林林壑爭盤紆寺門高開

洞庭野殿腳插入赤沙湖。五月寒風冷佛骨。六
時天樂朝香鑪。地靈步步雪山草。僧寶人人滄
海珠。塔劫宮牆壯麗敵。香廚松道清涼俱。蓮花
交響共命鳥。金榜雙迴三足烏。方丈涉海費時
節。玄圃尋河知有無。暮年且喜經行近。春日兼
蒙暄暖扶。飄然斑白身。奚適傍此煙霞茅。可誅
桃源人家易制度。橘州田土仍膏腴。潭府邑中
甚淳古。太守庭內不喧呼。昔遭衰世皆晦跡。今

幸樂國養微軀。依止老宿亦未晚。富貴功名焉
足圖。久爲野客尋幽慣。細學何顛免興孤。一重
一掩吾肺腑。山鳥山花吾友于。宋公放逐曾題
壁。物色分留與老夫。

此先生疲於奔迫之餘。暫抒其家國危亡之
憂。而欲遊心於域外。以寄其曠達之懷者。然
非其真也。言我來此玉泉之南。有所謂麓山
寺者。其林壑之美。固已殊矣。而又有與之盤

紆爭勝者則道林實爲匹敵焉。夫此二寺之門皆高開於洞庭之野，而其殿腳直欲插入於赤沙湖中，其結構之廣闊如此，所處旣高，則其風自寒。雖五月盛夏，可冷佛骨。焚修旣盛，則梵樂常舉。六時之間，朝繞香鑪，以其地言之，卽雪山之祇樹林也。以其人言之，皆滄海之智慧珠也。兩寺之中，其塔劫宮牆之壯麗，工力悉敵。其香廚松道之清潔，供具皆精。

夜漏則蓮花交響有如共命之鳥二首而一身日出則金榜雙懸同迴三足之鳥共邀其離照是則不必涉海而求方丈尋河而訪玄圃矣經行旣近適相宜於垂暮之年暄暖相扶又恰逢此方春之日然則斑白如余者奚事他適哉亦惟就此煙霞而誅茅以相傍可耳況此地不異桃源謀家易爲制度又與橘州相近田土易得膏腴且風俗淳古吏鮮追

呼疇昔之晦跡於衰世者。今且得樂國而養生矣。從此依止此中之老宿。而高談性命之學。尙未爲晚。彼悠悠世上之功名富貴。又焉足圖乎。以久爲野客之人。而更學何願。精求玄理。倍加清興。是則荒山道林。一重一掩。正合吾之肺腑。而山中之琪花異鳥。皆可爲吾之友朋。昔有宋公。放逐於此。曾已棲心幽賞。見於題壁。今留此一半。分與老夫。則荷篠從

遊惟恐弗逮又安敢交臂失之哉讀此一篇
似老杜卽欲在此出世於麓山道林中作一
居士矣然豈其心哉不過姑妄言之以寄一
時之襟抱耳看他句句對仗精工流走直與
近體無異而古拗道勁絕無排諧靡軟之氣
是大可爲作七言排律之秘妙也

杜詩言志卷十六終